



## XALQ DEPUTATLARI NAVOIY SHAHAR KENGASHINING Q A R O R I

2026-yil 18-fevral

VII-18-12-5-79-K/26

Navoiy shahar

### **O‘zbekiston Respublikasi Oliy Majlisi Senati Kengashining 2025-yil 28-yanvardagi “Xalq deputatlari viloyat, tuman va shahar Kengashi huzurida ekspert guruhi tashkil qilish to‘g‘risida”gi KQ-52-V sonli qarori ijrosini ta‘minlash to‘g‘risida**

O‘zbekiston Respublikasi Oliy Majlisi Senati Kengashining 2025-yil 28-yanvardagi KQ-52-V-sonli qaror ijrosini ta‘minlash maqsadida “Mahalliy davlat hokimiyati to‘g‘risida”gi O‘zbekiston Respublikasi qonunining 6- va 24-moddalariga muvofiq, xalq deputatlari Navoiy shahar Kengashi

#### **QAROR QILADI:**

1. O‘zbekiston Respublikasi Oliy Majlisi Senati Kengashining 2025-yil 28-yanvardagi KQ-52-V sonli qarori ijro uchun qabul qilinsin.
2. O‘zbekiston Respublikasi Oliy Majlisi Senati Kengashining 2025-yil 28-yanvardagi KQ-52-V-sonli qarorning 3-bob 11-bandiga asosan xalq deputatlari shahar Kengashi huzuridagi ekspert guruhi to‘g‘risidagi nizom 1-ilovaga, guruhning tarkibi 2-ilovaga muvofiq tasdiqlansin.
3. Xalq deputatlari Navoiy shahar Kengashining 2025-yil 28-fevraldagi VII-5-41-5-79-K/25-sonli qarori o‘z kuchini yo‘qotgan deb hisoblansin.
4. Xalq deputatlari shahar Kengashi va Kengash kotibiyati (J. Hafizov) tasdiqlanayotgan nizom talablari asosida o‘z vakolatiga kiradigan vazifalarni samarali amalga oshirishga ko‘maklashuvi fuqarolik jamiyati institutlari vakillaridan iborat bo‘lgan ekspert guruhi faoliyatini jamoatchilik asosida tashkil etish bo‘yicha tashkiliy ishlarni amalga oshirsin.
5. Mazkur qarorining ijrosini nazorat qilish xalq deputatlari Navoiy shahar Kengashining barcha doimiy komissiyalari zimmasiga yuklansin.

**Kengash raisi**



**BAZAROV  
BAXTIYOR  
YAXSHILIKOVICH**

Xalq deputatlari Navoiy shahar  
Kengashining  
2026-yil 18-fevraldagi  
VII-18-12-5-79-K/26 -son qaroriga  
1-ilova

## **Xalq deputatlari shahar Kengashi huzuridagi ekspert guruhi to'g'risida NIZOM**

### **1-bob. Umumiy qoidalar**

1. Shahar Kengashi huzuridagi ekspert guruhi to'g'risidagi namunaviy nizom (bundan buyon matnda Nizom deb yuritiladi) Shahar Kengashi huzuridagi ekspert guruhi (bundan buyon matnda Ekspert guruhi deb yuritiladi) faoliyatini tartibga soladi.

2. Ekspert guruhi shahar Kengashi (bundan buyon matnda shahar Kengash deb yuritiladi) va uning doimiy komissiyalari faoliyatini ekspert va axborot-maslahat jihatidan ta'minlash, ularning norma ijodkorligi faoliyati hamda nazorat-tahlil tadbirlarini tayyorlash va o'tkazishga ko'maklashish uchun tuzilgan, o'z ishini jamoatchilik asosida olib boradigan maslahat organi hisoblanadi.

3. Ekspert guruhi shahar Kengash qarori bilan tashkil etiladi.

4. Ekspert guruhining xulosalari tavsiyaviy xususiyatga ega. 5. Ekspert guruhi o'z faoliyatida O'zbekiston Respublikasining **Konstitutsiyasi** va qonunlariga, O'zbekiston Respublikasi Oliy Majlisi palatalarining qarorlariga, O'zbekiston Respublikasi Prezidentining farmonlari, qarorlari va farmoyishlariga, O'zbekiston Respublikasi Vazirlar Mahkamasining qarorlari va farmoyishlariga, tegishli shahar Kengash qarorlariga, mazkur Nizomga hamda boshqa qonunchilik hujjatlariga amal qiladi.

### **2-bob. Ekspert guruhining asosiy vazifalari, huquq va majburiyatlari**

6. Quyidagilar Ekspert guruhining asosiy vazifalari hisoblanadi: shahar Kengash sessiyasi kun tartibiga kiritilgan masalalarni doimiy komissiyada dastlabki tarzda ko'rib chiqishda ishtirok etish; shahar Kengash qarorlari loyihalari O'zbekiston Respublikasi **Konstitutsiyasi** va qonunlariga, qonunchilik hujjatlariga, mamlakatimizda amalga oshirilayotgan islohotlarning maqsad va vazifalariga mosligi nuqtai nazaridan o'rganib chiqish va tavsiyalar berish;

qonunlarni ularda korrupsiyaga, gender tenglik buzilishiga, boshqa huquqbuzarliklarni sodir etishga shart-sharoit yaratuvchi, shuningdek, tadbirkorlik subyektlari uchun ortiqcha ma'muriy va boshqa cheklavlarni joriy etuvchi qoidalar va normalarni aniqlash nuqtai nazaridan tahlil etish;

shahar Kengash, uning doimiy komissiyalari faoliyatini tashkil qilish bo'yicha xalqaro tajribani o'rganish va zarur hollarda ularni vakillik organlari faoliyatida qo'llash bo'yicha takliflar tayyorlash;

shahar Kengash qarorlari loyihalarini ishlab chiqishda doimiy komissiyalarga ko'maklashish;

shahar Kengash, uning doimiy komissiyalariga nazorat-tahlil tadbirlarini tayyorlash va o'tkazishda ko'maklashish;

shahar Kengash, uning doimiy komissiyalari va deputatlarining fuqarolar, nodavlat notijorat tashkilotlari va fuqarolik jamiyatining boshqa institutlari bilan o'zaro hamkorligini tahlil qilish, ular o'rtasida hamkorlikni takomillashtirish yuzasidan takliflar ishlab chiqish;

fuqarolarning huquqlari, erkinliklari va qonuniy manfaatlariga daxl qiluvchi eng muhim masalalar yuzasidan shahar Kengashning faoliyati haqidagi jamoatchilik fikrini o'rganish va har tomonlama tahlil qilish;

shahar Kengash deputatlari tomonidan aholi bilan o'tkaziladigan uchrashuv va sayyor qabullar, tushuntirish ishlari va ma'naviy-ma'rifiy tadbirlarda ishtirok etish, ularning samaradorligini oshirish yuzasidan takliflar ishlab chiqish; davlat va hududiy dasturlar loyihalarini, tadbirlar rejalarini va davlat organi faoliyatiga taalluqli, shu jumladan korrupsiyaga qarshi kurashish to'g'risidagi boshqa hujjatlarni ishlab chiqish yuzasidan takliflar tayyorlash, qabul qilingan dasturlarni amalga oshirishda vakolatlari doirasida ishtirok etish, bajarilgan ishlarning samaradorligini tahlil qilish, shuningdek, yo'l qo'yilgan xato va kamchiliklarni bartaraf etish yuzasidan takliflar ishlab chiqish;

davlat organi rahbarlari va xodimlarining fuqarolar bilan uchrashuvlarini, shuningdek, jismoniy va yuridik shaxslar murojaatlarini ko'rib chiqish bilan bog'liq ishlarni tashkil etishda qatnashish, ularning amalga oshirilishi ustidan monitoring o'tkazish;

shahar Kengash, uning doimiy komissiyalari va deputatlari tomonidan o'tkaziladigan konferensiya, seminar, "davra suhbatlari"ni tashkil etishda ko'maklashish va ularda ishtirok etish.

7. Ekspert guruhi zimmasiga yuklatilgan vazifalarni bajarish uchun: shahar Kengash, uning doimiy komissiyalaridan o'z faoliyatini amalga oshirish uchun zarur bo'lgan axborotni so'rash va olish;

shahar Kengash, uning doimiy komissiyalari tomonidan tashkil etiladigan majlislar va boshqa tadbirlar to'g'risidagi axborotni oldindan olish hamda mazkur tadbirlarda belgilangan tartibga qat'iy rioya etgan holda ishtirok etish;

shahar Kengash, uning doimiy komissiyalari ishchi guruhlari tarkibida davlat organlari va boshqa tashkilotlarga borish;

shahar Kengashga Ekspert guruhi zimmasiga yuklangan vazifalar yuzasidan takliflar kiritish;

shahar Kengashning tegishli doimiy komissiyasi majlisida ishtirok etish va unda ko'rib chiqilayotgan masala yuzasidan fikr bildirish;

shahar Kengash hamda uning doimiy komissiyasi faoliyati samaradorligini oshirish bo'yicha takliflar va tavsiyalarni ishlab chiqish hamda amalga oshirish uchun zarur bo'lgan davlat organining axborotlari, statistika va boshqa materiallarini belgilangan tartibda olish;

shahar Kengash raisining ruxsati bilan ommaviy axborot vositalarida Ekspert guruhi nomidan chiqishlar qilish huquqiga ega.

Ekspert guruhi qonunchilik hujjatlariga muvofiq boshqa huquqlarga ham ega bo'lishi mumkin.

8. Ekspert guruhi o'z faoliyatini amalga oshirishda:  
qonunchilik hujjatlari talablariga qat'iy rioya qilishi;  
shahar Kengash faoliyati bilan bog'liq qonunchilik hujjatlarida belgilangan cheklolarga amal qilishi;  
shahar Kengash yoki boshqa davlat organlarining o'z vakolatlari doirasida amalga oshiradigan faoliyatiga aralashmasligi;  
shahar Kengash, uning doimiy komissiyalari va kotibiyati faoliyat ko'rsatishi uchun to'sqinlik qilmasligi;  
fuqarolarning or-nomusi va qadr-qimmatini tahqirlashga, ularning shaxsiy hayotiga aralashishga yo'l qo'ymasligi;  
o'z faoliyati davomida olingan axborotning, agar bunday axborotni tarqatish qonun bilan cheklangan bo'lsa, maxfiylikka rioya qilishi shart. Ekspert guruhining zimmasida qonun hujjatlariga muvofiq boshqa majburiyatlar ham bo'lishi mumkin.

### **3-bob. Ekspert guruhining tarkibini shakllantirish va ishini tashkil etish tartibi**

9. Ekspert guruhining tarkibiga rais, rais o'rinbosari, kotib va a'zolari kiradi.

10. Ekspert guruhi a'zolariga, qoida tariqasida, shahar Kengash deputatlari, shahar Kengash kotibiyati xodimlari, faxriy deputatlar, ilmiy va ta'lim muassasalarining malakali mutaxassislari, jamoatchilik faoliyati sohalarida katta amaliy tajribaga ega obro'-e'tiborli fuqarolar, shuningdek, nodavlat notijorat tashkilotlari, ommaviy axborot vositalari va fuqarolik jamiyatining boshqa institutlari vakillari qabul qilinadi.

Ekspert guruhi tarkibi, qoida tariqasida:

xalq deputatlari viloyat va Toshkent shahar Kengashi huzurida tashkil qilinganda — 20 kishidan;

xalq deputatlari tuman (shahar) Kengashi huzurida tashkil qilinganda — 10 kishidan oshmasligi lozim.

11. Ekspert guruhining tarkibi shahar Kengash qarori bilan har yili tasdiqlanadi.

Ekspert guruhining faoliyatiga rahbarlik shahar Kengash raisi, Ekspert guruhiga mas'ul kotiblik shahar Kengash kotibiyati mas'ul xodimlaridan biri tomonidan amalga oshiriladi.

12. Quyidagi holatlarda Ekspert guruhining a'zolari uning tarkibidan chiqariladi:

ular tomonidan Ekspert guruhi tarkibidan chiqish to'g'risida ariza berilganda;

Ekspert guruhining majlislarida muntazam ravishda ishtirok etmaganda;  
mazkur Nizomda belgilangan majburiyatlarni, shuningdek Nizom talablarini birnecha bor buzganda;

ularga nisbatan chiqarilgan sudning ayblov hukmi qonuniy kuchga kirganda;

vafot etganda, shuningdek, sudning qonuniy kuchga kirgan hal qiluv qarori asosida ular muomalaga layoqatsiz, bedarak yo'qolgan yoki vafot etgan deb topilganda.

13. Ekspert guruhining tasdiqlangan a'zolari haqidagi ma'lumotlar, shuningdek, ularning aloqa ma'lumotlari shahar Kengashning rasmiy veb-saytida (E-kengash elektron platformasida) e'lon qilinishi mumkin.

14. Ekspert guruhining raisi:

Ekspert guruhining faoliyatini tashkil qiladi va unga umumiy rahbarlik qiladi;

Ekspert guruhining majlislarini chaqiradi va kun tartibini belgilaydi;

Ekspert guruhining majlislarida raislik qiladi;

Ekspert guruhining ish rejasini, majlisi bayonnomasini va boshqa hujjatlarini tasdiqlaydi;

Ekspert guruhi a'zolarining zimmasiga yuklatilgan vazifalarni bajarilishini muvofiqlashtiradi;

Ekspert guruhining samarali ishini ta'minlash bo'yicha boshqa vakolatlarni amalga oshiradi.

15. Ekspert guruhining raisi bo'lmagan taqdirda, uning vakolatlari va majburiyatlarini rais o'rinbosari bajaradi.

16. Ekspert guruhi raisining o'rinbosari rais yo'qligida Ekspert guruhining majlislarida raislik qiladi, Ekspert guruhining faoliyatini samarali tashkil qilish bo'yicha boshqa vakolatlarni amalga oshiradi.

17. Ekspert guruhining kotibi:

Ekspert guruhining faoliyatini uslubiy, tashkiliy-huquqiy va tashkiliy-texnik jihatdan ta'minlash masalalarini hal qiladi;

Ekspert guruhining navbatdagi majlisiga barcha zarur materiallar o'z vaqtida tayyorlanishini ta'minlaydi;

kun tartibiga muvofiq Ekspert guruhi majlislari o'tkazilishini tashkil etadi;

Ekspert guruhi majlisi o'tkaziladigan sana, joy va taklif etiladigan shaxslar ro'yxatini Ekspert guruhining raisi bilan kelishadi;

Ekspert guruhining a'zolarini va taklif etilgan shaxslarni Ekspert guruhi majlisi o'tkaziladigan joy, sana va vaqt haqida xabardor qiladi; Ekspert guruhi tomonidan tayyorlanadigan yakuniy hujjatlarning loyihalarini tayyorlaydi;

Ekspert guruhi a'zolarining fikr-mulohazalari, takliflarini umumlashtiradi;

Ekspert guruhi xulosalarining ko'rib chiqilishi natijalarini monitoring qiladi va uning natijalarini Ekspert guruhi majlisida ko'rib chiqish bo'yicha takliflar kiritadi;

Ekspert guruhi majlisining bayonnomasini rasmiylashtiradi va tasdiqlangan bayonnomaning Ekspert guruhi a'zolari hamda boshqa manfaatdor shaxslarga jo'natilishini ta'minlaydi.

Ekspert guruhining faoliyatini samarali tashkil qilish bo'yicha boshqa vakolatlarni amalga oshiradi.

18. Ekspert guruhining a'zolari o'z majlislarida ko'rib chiqiladigan masalalarni muhokama qilish va hal qilishda o'z vakolatini boshqalarga o'tkazish huquqiga ega emas.

Ekspert guruhining majlisida ishtirok etish imkoni bo'lmagan holatlarda, uning a'zosi majlis kun tartibidagi masalalar bo'yicha o'z fikrini yozma shaklda yuborishi mumkin. Bunda uning fikri majlisda ko'rib chiqiladi va ovoz berishda hisobga olinadi.

Ekspert guruhining a'zolari:

o'z zimmlariga yuklatilgan vazifalarni bajarish uchun shahar Kengash sessiyalarida, uning doimiy komissiyalari tomonidan tashkil etiladigan majlislarda va boshqa ommaviy tadbirlarda ishtirok etadi;

Ekspert guruhi ish rejalarining loyihasi yuzasidan takliflar tayyorlaydi, ularni Ekspert guruhi majlisida ko'rib chiqish uchun kiritadi va tasdiqlangan ish rejalar bajarilishini ta'minlaydi;

shahar Kengash, uning doimiy komissiyalari faoliyatining samaradorligini oshirish bo'yicha takliflar va tavsiyalarni ishlab chiqishda hamda amalga oshirishda qatnashadi;

Ekspert guruhining kun tartibiga kiritilgan masalalar yuzasidan tahliliy va boshqa materiallar tayyorlaydi;

Ekspert guruhining zimmasiga yuklangan vazifalarga muvofiq boshqa vakolatlarni amalga oshiradi.

19. Ekspert guruhi faoliyatining asosiy masalalari uning majlisida ko'rib chiqiladi. Ekspert guruhining majlisi uning ish rejalari asosida, qoida tariqasida, har oyda kamida bir marta chaqiriladi.

Ekspert guruhining raisi Ekspert guruhi a'zolarining uchdan bir qismining yozma murojaati asosida uning navbatdan tashqari majlisini chaqirishi mumkin. Ekspert guruhining yig'ilishlari va kun tartibidagi masalalar shahar Kengashning rasmiy veb-saytida (E-kengash elektron platformasida) e'lon qilinishi mumkin.

20. Ekspert guruhining majlislariga davlat organlari va tashkilotlari, nodavlat notijorat tashkilotlari va fuqarolik jamiyati institutlarining vakillari taklif etilishi mumkin.

21. Ekspert guruhi majlisi kun tartibining loyihasi Ekspert guruhi kotibi tomonidan Ekspert guruhi raisi va a'zolarining takliflari asosida shakllantiriladi.

22. Ekspert guruhining majlisini uning raisi olib boradi. Rais ishtirok eta olmagan holatlarda, majlisni uning o'rinbosari olib boradi.

Ekspert guruhining majlislarida shahar Kengash deputatlari va kotibiyat xodimlari ishtirok etishi mumkin.

23. Ekspert guruhining majlisi, agar unda Ekspert guruhi a'zolarining kamida yarmi (kvorum) ishtirok etgan taqdirda vakolatli hisoblanadi.

24. Ekspert guruhining xulosasi majlisda ishtirok etayotgan Ekspert guruhi a'zolarining oddiy ko'pchilik ovozi bilan qabul qilinadi.

25. Ekspert guruhining har bir a'zosi qabul qilinayotgan xulosalar bo'yicha o'zining fikrini yozma shaklda ifodalashga haqli. Bu holatda uning fikri Ekspert guruhi majlisining bayonnomasiga majburiy tartibda qo'shib qo'yiladi.

26. Ekspert guruhining majlisida qabul qilingan xulosasi bayonnoma bilan rasmiylashtiriladi. Ekspert guruhi majlisining bayonnomasi kotib tomonidan imzolanadi, majlisga raislik qiluvchi tomonidan tasdiqlanadi va uch kun muddatda shahar Kengashga, Ekspert guruhi a'zolariga va manfaatdor shaxslarga yuboriladi.

27. Ekspert guruhining kotibi Ekspert guruhi a'zolari ko'magida Ekspert guruhi xulosalari ko'rib chiqilishini o'rganadi, zarur bo'lgan hollarda, Ekspert guruhining raisiga tegishli takliflar kiritadi.

#### **4-bob. Ekspert guruhi a'zolarini rag'batlantirish**

28. Shahar Kengash, uning doimiy komissiyalari va Ekspert guruhining majlislarida doimiy ravishda ishtirok etib, shahar Kengash hujjatlarini ko'rib chiqish va muhokama qilishda o'z takliflari bilan faol qatnashgan, shahar Kengash uchun tavsiyalar, tahliliy materiallar ishlab chiqish, nazorat-tahlil tadbirlarini o'tkazishga ko'maklashish va ishtirok etish, qabul qilingan qonunchilik hujjatlarining mazmunmohiyatini tushuntirishda jonbozlik ko'rsatgan Ekspert guruhi a'zolari rag'batlantirilishi mumkin.

29. Rag'batlantirish shahar Kengash raisi, shahar Kengash doimiy komissiyasi tashabbusi bilan tashakkurnoma e'lon qilish, turli mukofotlarga tavsiya qilish, yilda bir martalik pul mukofoti yoki qimmatbaho sovg'a berish tarzida amalga oshiriladi.

#### **5-bob. Yakunlovchi qoidalar**

30. Ekspert guruhining faoliyatini moddiy-texnik jihatdan ta'minlash shahar Kengash tomonidan, shuningdek, qonun hujjatlarida taqiqlanmagan boshqa manbalar hisobidan amalga oshiriladi.

31. Ekspert guruhining faoliyati uning nizomiga va O'zbekiston Respublikasining qonunchilik hujjatlariga muvofiq ekanligini nazorat qilish shahar Kengash raisi tomonidan amalga oshiriladi.

Korxonalar, muassasalar va tashkilotlarning rahbarlari Ekspert guruhi a'zosining shahar Kengash va uning organlari faoliyatidagi ishtiroki davomida uning ish joyini (lavozimini) saqlagan holda, ishdan ozod qilishlari shart hamda bu vaqtda deputatning o'rtacha ish haqi saqlanib qolinadi.

32. Ekspert guruhining va shahar Kengash raisining Ekspert guruhi faoliyati bilan bog'liq hujjatlari ustidan belgilangan tartibda shikoyat qilinishi mumkin.

33. Ekspert guruhi to'g'risidagi nizom va unga kiritiladigan o'zgartirish hamda qo'shimchalar shahar Kengashning qarori bilan tasdiqlanadi.



Xalq deputatlari Navoiy shahar  
Kengashining  
2026-yil 18-fevraldagi  
VII-18-12-5-79-K/26 -son qaroriga  
2-ilova

**Xalq deputatlari Navoiy shahar Kengashi huzuridagi ekspert guruhi  
TARKIBI**

<b>T/r</b>	<b>F.I.Sh</b>	<b>Ish joyi va lavozimi</b>
<b>Rais</b>		
1	Bazarov Baxtiyor Yaxshilikovich	xalq deputatlari Navoiy shahar Kengashi raisi
<b>O‘rinbosar</b>		
2	Hafizov Jo‘rabek O‘ktam o‘g‘li	xalq deputatlari Navoiy shahar Kengashi, xalq deputatlari Navoiy shahar Kengashi kotibiyati mudiri
<b>Kotib</b>		
3	Toyirov Diyorbek Alisher o‘g‘li	Xalq deputatlari Navoiy shahar Kengashi, xalq deputatlari Navoiy shahar Kengashi deputati kotibiyati bosh mutaxassisi
<b>A‘zolari</b>		
4	Mirzayev Alisher Umirzoqovich	«Navoiy kon-metallurgiya kombinati» Davlat korxonasi 1- gidrometallurgiya zavodi kon boshqarmasi direktorining xodimlar va ma‘muriy masalalar buyicha o‘rinbosari, xalq deputatlari Navoiy shahar Kengashi deputati
5	Sanaqulov Orol Aliqulovich	Navoiy shahar hokimligi gazetasi bosh muharriri
6	Ko‘ziyev Ravshan Rayimovich	“Hududgazta‘minot” AJ “Hududgaz Navoiy” boshlang‘ich kasaba uyushmsi raisi, xalq deputatlari Navoiy shahar Kengashi deputati
7	Murodov Nodirjon Abdulloyevich	“Navoiyazot” aksiyadorlik jamiyati atrof-muhit va tabiiy resurslardan oqilona foydalanish bo‘limi boshlig‘i, xalq deputatlari Navoiy shahar Kengashi deputati
8	Mirzayev Javohir Fazliddin o‘g‘li	xalq deputatlari Navoiy shahar Kengashi deputati
9	Suvonov Umid Suvonovich	Navoiy shahar adliya bo‘limi boshlig‘i
10	Umarov Boboqand Ikromovich	“Do‘stlik bayrog‘i” va “Znamya drujbi” gazetalari tahririyati davlat unitar korxonasi bosh muharriri, xalq deputatlari Navoiy shahar kengashi deputati

